



BIBLIOTHECA
UNIV. JAGELL.
CRACOVENSIS

593066

kat.komp.

Mag. St. Dr.

I

ASSERTIONES
EX
VNIVERSA PHILOSOPHIA,
SVB AVSPICIIS
Illustrissimi Domini,
D. STANISLAI RA-
DZIEIOWSKI, PALATINI
RAWENSIS, SOCHACZOWIENSIS,
&c. &c. CAPITANEI, &c.
publicè propugnandæ

A
SIMONE REYKOWIC,
PHILOSOPHIÆ, IN COL-
legio Połtowiensi Societ: IESV,
Auditore.

Anno Domini,
Vigesimo primo supra Millesimum Sexcen-
tesimum, Mense Die Hora

287. CRACOVIAE, 1621
In Officina Andreae Petricouij, S. R. M. Typographi.

Vno Sidereum Sol tempore fulgidus AGNVM,
Et Dea floricomum Ver Zephyritis init:



Lux rutilans, VIR MAGNE, Tux virtutis & altæ
Stirpis, inAGNIGERO, stēmate vernat, honos.

593066I

523

ILLVSTRISSIMO DOMINO,
DOMINO STANISLAO
RADZIEIOWSKI, PALATI
NORAWENSI, SOCHACZOWIEN.

&c. &c. CAPIT ANEO &c.

Domino, ac Meccœnati colendissimo,

ÆTERNAM FÆLICITATEM.

D*Hryxæum Vellus, Græci olim Principes, certatim petière Illustr: Domine; currebatur Colchos lōginquis itineribus eius potiundi gratiā; par erat animus, par laboris contentio, & Herorum fortitudo: ceterum secunda Iasonis fortuna, ceteris antecelluit, qui Medæa propensione, solus peruios accessus reperit. Aureum Vellus in Græciam æiternā sui gloriā nominis, auexit. Triumphus cuiusdam insignioris, præclarum inçlytæ Prosapie Tuæ stemma, nitidissimi Velleris AGNEM præferens, Heros Illustrissime, gerit symbolum; primium illius (quantum ego assequor) Favoris notam exhibens, quo inuictissimus Poloniarum Rex, eiusq; Serenissimus Natus, & ceteri per Europam AVREI VELLERIS Principes, in te feruntur: eius deinde victoriæ, quam ex artium optimarum, velut difficulter accessa Colchide, cum illustri, tum domi, tum foris, omnium admurmuratione, auctus rara Diuinarum humanarumq; rerum peritia, præcelsa indole*

animi virtutibus exaggerati aditibus, auspiciatissimo reportaras. Hæc in Te singularem Religionis curam, Sapientie studium, amorem Patrie, Reipublicæq; consouet: Hæc te in dicendo Oratorem disertissimum, in ratiocinando Philosophum scientissimum, in consilijs ferendis Senatorem amplissimum demonstrat, cum perenni Tui nominis claritate. Plura, eaq; propè innumera Tibi concessa, diuinitus ornamenta percensere dicendo, neq; est consilij mei, nec loci huius, aut temporis, neque modestia Tux. Unum illud audenter profitebor, cum Theorematis è Peripatheticâ prodeuntibus officinâ, sat actum iri prosperè, si Te Arbitro frui quiuerint & Mecenate. Tibi à me illa consecrari volunt; momentum sibi permagnum affore existimant, si fuerint accepta per benignè: magna à TE Procerum dignissimo splendoris, magnam roboris accessionem ab AGNO TVO, Musarum Archetypo mansuetiorum, prestolantur. Deferar ego (ut spero) Te auspice Illustr: Domine, ab AGNO Tui Dignatus, per immensum Philosophicæ disceptationis Oceanum, longè securius, quàm delata fuerit Hellesponti Virgo ab Ariete illo, qui

Tempora nocturnis aqua diurna facit,
Impositamquè sibi qui non benè pertulit Hellen:
eiusquè niueum vellus auro fulgentius in Te venerabor.

Illustrissimæ Celsitudinis Tux,

Obsequentissimus

Simon Reykowiez.

ASSERTIONES PHILOSOPHICÆ.

EX PRIMA PHILOSOPHIA.

I.

Rima Philosophia, seu Metaphysica, Ens reale, quatenus D E O, & procreatis entibus, Substantiæ & Accidenti competit, tanquam obiectum adæquatum considerat. Porro Ens, ex ipsiusmet vi significationis, in eo positum est formaliter, quod habeat realem quidditatem, extra causas poni aptam: idem generis analogi ratione complectitur, species respectat analogas, & in conceptu obiectivo multiplex omninò, secundum quid unum est.

II.

Ternas Entis essentia sibi vindicat proprietates: VNUM, VERVM, BONVM; reales illas quidem, verum quas non res inter se, vel ab Ente discriminèt, sed sola connotatio, vel negationem meram, vel respectu reali fundamento nixum, consuetum ab intellectu dicens. Itaq; VNUM, Entis unitatem diuisionis expertem, VERVM cognoscibilitatem, BONVM appetibilitatem eiusdem indicat.

III.

Entium singularitatem, quorum essentia & perfectio circumscripta est, principiat Metaphysicè discrimen indiuiduale proprium, indiuiduo unicuiq; addens naturæ specificæ positiuam realitatem, ab eadem sola ratione distinctam. Principium autem Physicum unitatis indiuidualis est Physica hæcceitas; hæc videlicet materia, & hæc substantialis aut accidentalis forma; quarum vtraque Platonem E. G. ab Aristotele, in humana essentia; Muricem Tyrium, ab Ostro Sidonio, in purpureo colore distinguit.

A

IV.

IV.

DEV M, quem Ter Optimum, Terq; Maximum veneramur, esse, non fides tantum docet, sed etiam lumen naturæ demonstrat. Idem est Actus purissimus, omnem realem, & rationis compositionem respues; Ens à se, Vnum, perfectione Infinitum, potestate Immensum, duratione Æternum, Statu Immutabile; omnis esse fons & perenne principiu; cuius essentia est existerè, ac ad intra, seu immanenter operari.

V.

ENtis creati existentiam, sola ratio separat à Quidditate, cuius illa Metaphysicum accidens est. Creatura nulla fuit actu ab æterno, sed in potentia tantum: hæc verò possibilitas præter denominationem à potentia activa agentis, ex parte creaturæ dicit negationem existentia, cū non repugnantia ad eandem. Substantiæ quæ subsistunt, subsistentiam; Accidentia quæ inhzrent, inhzrentiam habent, vt essendi modos; qui actualiter sumpti ab essentia & existentia ex natura rei, radicaliter accepti à neutra per rem differunt.

VI.

INtelligentias nullæ partes Physicæ constituunt, nullæ integrant; eadem tamen Metaphysicam ex essentia & existentia, natura & subsistentia, subiecto & accidente, genere & differentia, compositionem, & certos perfectionis limites habent. Earundem sunt totidem species de facto, quot individua; nulla tamen ratio prohibet eas intra eandem speciem à Creatore multiplicari. Mouere corpus motu locali, per se queunt Intelligentiæ; vacuum efficere, procreare, procreata ad nihilum redigere, educere de potentia Materiæ formas, insitâ virtute nequeunt.

**EX PHILOSOPHIA
NATVRALI.**

DE PRINCIPIIS CORPORIS

NATVRALIS.

VII.

9. Non for-

Non fortuiti concursus atomorum, aut earundem per se, & quasi consultò facta concretio, neque vlla veterum commenta constant Vniuersum: sed certa quædam statuunt principia, quæ nec ex se inuicem, neque ex alijs sunt, sed omnia fiunt ex ipsis. Eiusmodi sunt Materia, Forma, & Priuatio, si Fieri; Materia & Forma tantum, si factum esse, Entium Physicorum spectetur.

VIII.

Materia Prima creata est, generari & corrumpi impotens, deposcit substantiam partialem, vt terminum modumq;: Substantialium formarum per se; & indifferenter est receptiua: sine quauis singulatim, naturaliter; sine omni forma, diuinitus, potest permanere: formarum appetens tam earum quæ præsto sunt, quam absentium, etiam corruptarum vel amissarum semel; delectus inter appetendum faciendi nescia: Est actus entitatus incompletus, & simul absolute sumpta potentia passiuæ. Rectè à Philosopho definitur esse subiectum vniuscursusque, ex quo fit aliquid, cum insit non secundum accidens; & si corrumpitur aliquid, in hoc apibit vltimum.

IX.

Actuat Materiam forma, estque pars compositi potissima, vnum per se cum Materia constituens. Pulchrum quiddam (vt Peripatetici volunt) ab ea quippe informis Materiæ, atque adeo totius vniuersi omnis pulchritudo, omnis entium varietas, & distinctio. Rationalis forma creatur; educitur Materialis: neutra requirit materiam tempore, sed natura priorem; neutra naturæ vi reproducibilis iteratò. Forma vna vnam materiam, multas multæ informant ordinariè: Diuina facere potest virtus, vt vna multas, & multæ vnam informant. Rationalis anima in corpore etiam vt Quod subsistit: Materialis vt Quo in materia, extra materiam nullo pacto: possent verò Diuina potestate citra corporum consortium, seruari terribiles visu variarum ferarum formæ, in quas belliger Æneas,

*Ni docta comes tenues sine corpore vitas
Admoneat volitare caua sub imagine forma;
Irruat, & frustra ferro diuerberet vmbra.*

X.

Priuatio negat formam in apto subiecto; dum esse desinit, orditur principiationem; ita vt formæ priuatio, forma priuationis carentiâ subsequatur: dum principiat, non connotat materiæ dispositæ, sed materiæ secundum se capacitatem. Priuationum tantus numerus, quantus formarum quæ vni materiæ adiungi, & materialium quæ vnâ formam recipere possunt: tot species & genera priuationum, quot formarum.

XI.

Est Natura principium motus & quietis eius, in quo est primo, per se, & non secundum accidens: Materia & Forma vt rem naturæ, ita nomen obtinent. Ars natura inferior, eius tamen æmula, ei precium tribuit & dignitatem. Suspeximus Artis opera sæculis retroactis:

Stupebimus etiam nouam quot diebus artificiorum accessionem; quoties

Excudent alij spirantia mollius ærâ

---- Viuos ducent de marmore vultus:

quoties Archimedes imitari, Sphæram cōcinnabunt, in qua ex amussim obitus, progressiones, conuersiones Astrorum distinguunt,

----- Cæliq; meatus

Describent radio, & surgentia sidera dicent.

quoties digeret in numerū literulas Typographia, quæ [vt Sybilla olim]

Fata canit, foliūq; notas & nomina mandat.

Aurum aut efficietur, aut potabitur; videbuntur

--- Liquefacta boum per viscera toto

Stridere apes vtero & ruptis effervere costis;

è Cayri fornaculis pullorum agmina, naturâ arte dirigente, producētur.

XII.

Causa est principium per se influens esse in aliud. Causarum genera censentur esse quatuor: Materialis, Formalis, Efficiens, & Finalis: priores Intrinsecæ, Extrinsecæ posteriores appellantur. Materialis Substantiarum causa est Materia prima, eadem quantitatem sola recepat, & media quantitate, alia accidentia corporea; ex potentia verò subiecti, naturali vel obedientiali, educuntur omnes formæ accidentium cæterorum. For-

rum. Formalis causa vna eademq; actione actuat materiam, & constituit naturale compositum, quod præter materiam formamq; modum vni-
onis vnum in vno composito, eductum ex materia, terminatum ad formam dicit. Per vnitionem in fieri, per vnitionem in facto esse, compositum tam Materiam, quam Formam causat.

XIII.

Effectrix rerum Causa, si secunda sit, Ens creatum est, à quo præcedens actio est ratio in actu secundo efficiendi. Princeps rerum causa **D E V S**, cum omnibus causis secundis ad agendum immediatè se ipso concurrat, eademq; agit effectione, quâ secundum agens absque omni prædeterminatione, aut præuia motione causarum secundarum: non tamen rationalibus causis necessitatem aut modum ponit, quoties agunt arbitrato suo. Actionum & Effectorum indiuiduatio, ab eorundem hæc-
ceitate formaliter, effectiue ab indiuiduali causæ primæ concursu, procedit. A gemino agente totali, eiusdem generis & ordinis, tam simul, quam successiue, diuinâ vi, vnus effectus permanens effici posset, & Thersander Græco Polynice genitus, à Romulo:

Multi præterea quos fama obscura recondit,

à viris clarissimis, **D E I** supposita determinatione, progigni potuissent. Absentis causæ in efficiendo vices obit **D E V S**. Instrumentum est aliquid efficientis. Idea dicens conceptum formalem intellectiui agentis, ad idem genus causæ pertinet.

XIV.

Finalem causam, cuius gratiâ fit aliquid, Bonum propter se appetibile, verum vel apparens in actu primo, metaphorica motio in actu secundo constituit. Effecta Finis sunt tam eliciti voluntaris actus, quam ab eadem imperati, à reliquis effecti potentijs, honestatis, vel delectationis experiundæ causâ: commoda verò quibus vtimur, à nemine sui, sed honesti aut iucundi gratiâ expetuntur; quod liquidò monstrant quotquot generosioris animi sunt,

- - - Vitamq; volunt pro laude pacisci.

Cæterum vt Finis formaliter intendatur, intellectiua cognitione opus habet agens. Bruta quæ sensu dumtaxat pollent, cæteraq; agentia brutis inferiora ex naturæ instinctu, & materialiter tendunt in fines eos, ad quos ab Agente supremo ordinantur.

XV.

Monstra sunt prolapsus causarum secundarum, pareguas naturæ
 à recta & solita secundum speciem generatione exorbitantis.
 Hæc porrò in Viuentium genere sunt insigniora, & magis crebra. Mon-
 strum est quandoq; enormis artuum, corporumue moles: vt erat verus
 ille aut fabulosus Polyphemus, cuius per æquor procedentis

Iam, medium, nec dum fluctus latera ardua tinxit;

eiusdemq; lumen ingens,

Quod torua solùm sub fronte latebat

Argolici clypei aut Phebeæ lampadis instar.

Quandoque membrorum multitudo: interdum partium specie distin-
 ctarum nexus; quin etiam bruta hominis proles. Alcippe Elephantum,
 serpentē altera, belli initio Marsici, progenerauit; vt Author est Plinius.

XVI.

Nescia mens hominum Fati, Sortisq; futuræ. At Diuinam pro-
 uidentiam rectè dixerimus esse ineluctabile fatum, seu inhærentem
 rebus mobilibus immobilem dispositionem, per quam Deus suis quæq;
 necit ordinibus, & quæ arcanam præscientiam liberè quorundam en-
 tium actiones, quorundam necessariò euenturas, è Diuinæ intellectio-
 nis specula prospectantem præsupponit. In causis secundis ex electione
 operantibus fortuitos, in necessarijs casuales effectus, assignat Christiana
 Philosophia; Casum & Fortunam causare per accidens docet. error cõ-
 mento veterum inerat, cum dixere:

Sed nos

Te facimus Fortuna Deam, cælog, locamus.

DE PROPRIETATIBVS
 CORPORIS NATVRALIS.

XVII.

Corpori Physico trina competit dimensio, quam vñtato Quan-
 titatis nomine appellamus. Est autem Quantitas, accidens per
 se extensum, Lineam, Superficiem, & Corpus, velut species re-
 spiciens; aptum loco circumscribi, incapax actiuæ & passiuæ
 penetrationis.

penetrationis. Inanimis nullum magnitudinis aut paruitatis terminum præstituit Quantitas: moderatam viuencia poscunt magnitudinem; par iudicium de paruitate. Indiuisibilia realia, sua Quantitati, sua Qualitibus corporeis, sua Materix sunt, itemque partes actu distinctæ. Infinitum categorematicum in Quantitate continua datur, quoad partes proportionales, quoad æquales de facto non est: an dari queat virtute supernaturali, controuersum. Angelos, animasq; rationales innumeras existere posse, uero simillimum; DEVM simul infinita pernoscere certum est.

XVIII.

Internum Vbi, habent Entia creata, definito aut circumscripto modo. Locus extrinsecus est superficies corporis continentis immobilis, immobilitate uasis oppositâ mobilitati. Entis increati centrum ubiq; est (vt Trismegistus ait) circumferentia nusquam; imò si quæ produceretur extra sidera tellus (vt Poëta cecinit) extra anni Solisq; uias, DEVM præexistentem reperiret. Singula corpora singulis illocantur locis: posset (annuente DEO) Æneas procurrens in acie Turnum absentem in prælia poscere, & simul Turni metu sese in latebras nauigij longè distri conijcere; hoc est, Corpus vnum gemino simul in loco statui. Eodem etiam in loco plura corpora situaret DEVS, vt hæreat pede pes, densusq; viro vir. Nos fidei, id de Christo, monumenti saxum, fores conclusas, vterum Virginis Genitricis, solidaq; cœli corpora peruadente, affirmanti firmiter assentimur.

XIX.

Vacuum & Inane seu Spatium imaginarium, sunt loca corpore carentia, eodem repleti apta. Superficierum terminantium connotatione, vacuum ab inani dirimitur; creatâ virtute dari nequit, sed Diuinâ: postea quanti daretur, qui

*Stridentem fundam positis Mezentius armis
Ipse ter adductâ circum caput egit habenâ:
tempora plumbo non diffunderet; nec caderet qui
Ceruleus supra caput assitit imber
Noctem hyemq; ferens.*

in medio ramen vacui posita, posset talis Cetas insectari

- - - qualis equos Threissa fatigat

Herpalice,

Herpalice, volucremq; fuga praeuertitur Hebrum.
neque procurfus hic vno instanti, sed successiuè perageretur.

XX.

Morum adæquatè definiueris esse actum entis in potentia, quatenus in potentia: successiuus est motus omnis: instantanea mutatio Motus nomen per *κίνησις* vix meretur. Tam Motus quàm Mutatio à Mobili modaliter, ab Actione & Passione per rationem distinguitur, recipitur in mobili, à Terminò ad Quem sumit specificationem & contrarietatem. Vnus perfectè Motus est, si temporis quoque, termini, & mobilis, perfecta adsit vnitas. Quare Isebel Achabia coniunx, inter labendum ex præalto loco vitam efflans, non vsquequaque vno, sed ratione eiusdem materiæ, eorundemq; accidentium, vno motu humum petiuit. Alteratio Augmentatioq; ad Instans & Successionem *ἀνάσσει* sunt. Abacuch Propheten quem fulminis ocyor alis transportat Angelus, per ipsum DEI numen deferri in instanti *ἀδύνατον* erat.

XXI.

Rerum Duratio sola formalitate ab eorum Existentiâ differt: hæc si permanens sit, & simul initij ac finis expers, Diuinam æternitatem, quæ est interminabilis vitæ tota simul & perfecta possessio, constituit. Creatura verò ab æterno producta, non Diuinâ, sed participatâ æternitate duraret. Angelorum & rationalium animarum permanentia, Æuum; hoc est initiatam, sed limite à parte post carentem durationem exigit: cœpit illa esse intrinsecè, desineret per Diuinâ vim tam intrinsecè quam extrinsecè. Materiales formæ & composita Physica, subiecta corruptioni sunt: ijs proinde

Prima, que vitam dedit hora, carpsit.
Et *Stat suâ cuique dies, breue & irreparabile tempus*
Omnibus est vite.

Substantiæ tamen qua tales, tempore non mensurantur. Successiua duratio, seu Tempus pressè acceptum, est numerus motus secundum prius & posterius. Incipiunt intrinsecè, desinunt extrinsecè, composita permanentia. Indiuisibile ynumquodq; intrinsecè: successiuum quidquid est, extrinsecè & desinit, & inchoatur.

DEM VN.

DE MUNDO ET COELO.

XXII.

Mundus quoad quantitatem consideratus, Sphæras cœlestes, & quatuor Elementa complexu tenet suo: Mixtorum admiranda varietas & varia pulchritudo, Mundus quoad qualitatem est. Vtriusque finis vltimus DEVS est, immediati fines Homines vniuersi, rerum domini, à DEO conditi. Vterque non per se, sed per coordinationem est vnum Ens, ab solutissimæ in suo genere perfectionis; vt gubernari à DEO, situariue perfectius, finem, symmetriam, & ordinem consequi diuiniorem nequeat; accidentium solummodo perfectione, & Entium augmento magis possit exornari. Vterq; liberè productus, & certo tempore,

*Ver illud eras, ver magnus agebat
Orbis, & hybernis parcebant statibus Euri.*

XXIII.

Constat fide & experimento, vnum de facto mundum esse, plures, & propemodum infinitos produci à DEO posse, rationi & vero conforme est. Poterat mundus, quoad rerum permanentium productionem, fieri ab æterno; quoad Entia successiua, nequibat. Adam verò, si DEO coëxisteret ab æterno, vel actum intellectionis eliceret nullum, vel in sua sibi DEOq; coæterna intellectione perenniter permaneret. Fide credimus Mundum perpetuò non duraturum in eo quo nunc fruitur statu; sed vniuersali iudicio peracto, instaurandum à DEO: estque propius veritati, fore vt orbis Cœlici, præter Empyreum (nam hic Beatorum domicilium est) secundùm accidentia perficiantur. Aër ab impressis exhalationibus, Aqua ab accidentibus extraneis, Terra ab excrementis, ignis opera interueniente, repurgentur, & raritatis, lucis eximix, cætarumque velut dotium accessione decorentur. Æternùm nihilominus duraret mundus cum ea rerum & generationum vicissitudine, si DEVS aut hominum generi denuntiasset:

*Hic ego nec metas rerum, nec tempora pono,
Imperium sine fine dedi.*

aut illum ita comparatum statuisset æuo interminato conseruare.

XXIV.

Actio mundi productiua erat creatio, quæ efficit quidpiam ex non præsupposito subiecto; ea neque est sola Dei volitio, aut ipsa creatura, aut relatio creaturæ ad creatorem: sed distinctus à termino creationis modus. Entium omnium, aut aliquorum, principalis vel per naturam instrumentaria creatrix, nequit esse creatura; sed à Deo potest adcreandum, per obedientialem potentiam, eleuari. Formas omnes tam substantiales, quam accidentales producere potest creatio, modis rerum exceptis. Angeli, Materia prima, & rationales animæ, quæ per se terminant creationem, nullo pacto possunt terminare generationem.

XXV.

Decus & prænobilis vniuersi pars, ignara generari & corrumpi, Cœlum est; diuersa ab elementis præditum essentia, eaq; simplici, simplicitate contra mixtionem distincta. Octo Sphæræ mobiles comprehendit, cœlum nonum Emphyreum dicitur, & Beatitatis locus est: primum mobile stellas immotas gerit, estque earundem Firmamentum, qui supersunt cœli, Planetas deferunt; Saturni quidem orbi Firmamenti, Saturnali Iouis, huic Martis, isti verò Solis, Solari Veneris, Venero Mercurij, Mercuriano Lunæ orbis attiguus est. Adest singulis materies à Sublunari & orbium cæterorum materie specificè distincta; singulis item forma speciei diuersæ, animâ quauis inferior, sublunarium inanimorum formis antecellens. Omnes qualitatum corruptiuarum sunt incapaces, ab Agente naturali nunquam immutati; stellam verò, quæ ternis denis Cassiopeæ sideribus portento similis accesserat, Anno 1572. ac decessit exacto biennio, ad agens supernaturale producens vel addens cœli partes, referri oportere, scitum est.

XXVI.

Qualitas Cœlorum perfectiua lux est, eandem cum lumine sublunarium sortita speciem, calorem virtualiter efficiens. Rariores cœli partes perspicuitatem habent, Astra lumen narium perexiguum; sed hæc vbertim Sol, cuius lucem reuerberant, lumine vestit

Purpureo, Solemque suum sua sidera norunt.

Stellarum scintillatio nulla est; sed hanc illis affingit visus noster imbecillus. Lunares maculæ non sunt vallium, nionium, nemorumue icones vul-

nes vulgò creditæ; sed raræ admodum Lunæ partes, quæ lucem Solis modicè reflectunt, abundè transmittunt. Galaxia cœlestis est maxima minimorum siderum multitudo.

XXVII.

Circumaguntur octo cœli (Empyreum enim fixum consistit) à totidem Intelligentijs, quarum motrix facultas alia est ab intellectu & volitione: omnes cœlos infra octauam Sphæram sitos, & propria, & octauæ Sphære Intelligentia rotat occasum versus ab ortu, non è conuerso. Cœlis, vt sunt causæ vniuersales, secundùm; vt corpora particularia, præter naturam est motus: & erit quies præter lapsum postremi iudicij tempus exceptura. Quadrum perfectum exprimit cœli Empyrei figura, vt quidam volunt; circulum, vt alij: orbium reliquorum Sphœrica est, peraccomoda circumactioni, adeo regulariter institutæ, vt eam Pythagoras admiratus finitimam concentui ad numeros reuocato, vel metaphoricè, concentum ipsum esse pronunciauerit.

XXVIII.

Sidera fixa cœlis inseruntur; non innatant, vt opinata est Antiquitas. Soberrant Planetæ vagabundi, vnde & nomen inuenerunt. Fixorum numerus exæquat 1022. Iua cuique sunt loca, nomina, & officia. Motus Planetarum, Epicyclos, Excentricos, & concentricos requirit; tardior est cæterorum, Solis, & inferiorum Planetarum perniciosissimus; dū enim medios orbis, aut ne medios quidem cæteri emetiuntur:

Interea magnum Sol circumuoluitur annum.

Idem Amplitudine sua, centies sexagies sexies peruincit terræ molem, quā itidem sidus firmamenti vel minimum, decies octiesq; est maius.

XXIX.

Inter extremam terræ superficiem, & eius centrum, quod infernus occupat, 860. milliar: intercapedo est. Tam

Longa mæstos ducit ad manes via.

Quod si à centro terræ, Lunæ cauum infimo loco positum, 28359. (quod illi qui

*Ter sunt conati imponere Pelio Ossam,
Atq; Ossæ frondosum inuoluere Olympum,*

neutiquam contingerent) ab eodem conuexum firmamenti, cui quadratum vel teres Empyreum corpus imminet, 16; 27966. Polonis milliar: interstingui minoris, dicas licebit: Respectiuè

- - - - Facilis descensus Auerni:

Sed reuocare gradum, superasq; euadere ad auras,

Hoc opus, hic labor est.

XXX.

SOL medius inter reliquos orbes interiacet, quibus etiam longè dignior est, & actiuior. Cæteri quò situ sublimes, eò magis præcellentes, & maiori pollent ad agendum in inferiora potestate. Dierum vicissitudines, commutationes anni temporum quadripartitas, ad temperationem corporum aptas, zonas partim habitabiles, partim incultas, quæ aut frigore rigeant, aut vrantur calore, frugum & fructuum vbertatem, cæterosq; calorum effectus, potissimâ ex parte Soli attribues. Luna impulsu, reciprocos motus agit mare;

Exultantq; vada, atque esu miscentur arena.

Ostrea, Conchilia, Cancri, Lunæ accretionem decretionemq; imitantur. Sol Heliotropij & Scorpiuri flores secum circumuertit. Cum oriens exurit Syrius agros; Para auis non comperet, donec occidat; Thynni marini cursant æstro perciti; Cuculus occultitur, itemque Luscinia, & canere desinunt. Hæc, cæteraq; id genus, in reconditas cælorum qualitates; non in solam lucem, aut calorem, sunt referenda. Cæli influxu quiescente, inferiora hæc non quidem mox labefacta concidant, sed collabi sensim incipiant, est necesse.

XXXI.

COELI, instrumentariâ virtute, producant imperfecta Animalia, è putri materia prognata, quæ tamen eandem cum perfectis nacta sint speciem: tales apud Hypanim fluiuium, qui ab Europæ parte in Pontum influit, Aristoteles ait, bestiolas nasci, quæ vnum diem viuant. Sol verò neque instrumentaliter generat hominem, aut perfectius aliquod Animal: sed tantum, vt causa vniuersaliter adminiculans sublunarium procreationi. Quare Vituli generatio intra nubium conceptacula (vt arbitratus est Auic:) fieri nequiuit: sed ventorum, aut Dæmonum vi eo delatus erat, indeque post modum lapsus. Equas in Lusitania concipe-

re ex

re ex aspirante Fauonio, fabella est. neque Fœnix aſtrorum virtute ex patrijs cineribus, ſed è vitali ſemine exoritur; ac idcirco neque auis vnica eſt.

XXXII.

Agunt Cœli directè in corpora hominum, in animos indirectè, & velut per accidens; quatenus nempe corpus inclinatur ac adiuuat motus animorum. Hinc

Cælum non animum mutant, qui trans mare currunt.

Vani, & plerumque temerarij Genethliaci, Iudiciarij, & Planerarij, quoties inspectis leuiter ſideribus, liberis hominum effectus prænoſcere ſe putant, & ferunt in vulgus. Sapiens enim dominabitur aſtris. Morbos, frigora, tempeſtates, terræ ſterilitatem, ſiccitatem, & motus, probabiliter; ſiderum, Planetarumq; ortus, occubitus, ecclypſes certò ex inſpectione cœlorum, noſſe Astrologis vix conſeſſum: quanto minor iſdem ex Aſtrorum phœnomenis, fatalem neceſſitatem indicentibus, habenda fides.

DE ORTV ET INTERITV.

XXXIII.

Generatio ſubſtantiarum, eſt mutatio totius in totum, nullo ſenſibili permanente, vt ſubiecto eodem: ſit illo inſtanti, quo Corruptio. Forma, inadæquatus; Compoſitum, totalis terminus eſt generationis. Subiectum verò materia, cum qua manent complura accidentia in genito, quæ aderant corrupto. Vidiffes poſt funera Deiphobum, perinde vt ante,

*----- lacerum crudeliter ora,
Ora, manusq; ambas, populataq; tempora, raptis
Auribus, & truncas inboneſto vulnere nares.*

Quæ ſemel occubuere, tam permanentia, quàm ſucceſſiua, reproducere naturæ author poteſt; quod palam faciet vniuerſalis noſtrùm omnium Regeneratio. Pellicanus interfectis proprium cruorem pullis aſpergens, ne quicquã proficit: ſi tamen obſtupuere, vigori priſtino reſtituuntur. Sic vere ineunte, quæ obriguerat, reſumit vires,

*Indociliq; loquax gutture vernat auis;
& muſcæ prouolant, ſyncopen ſenſuum hyeme paſſæ.*

XXXIV.

Alteratio in communi, est mutatio secundum qualitates, eodem subiecto sensibili remanente; causarum veram qualitatum receptionem. Tarandus ergo, (animal id est Scythicum) Chamæleon, & Poly-
pus, ob sui corporis raritatem, & frequentes poros, varias colorum species referunt, non verò colorantur. Alteratio non fit per minima interpolata, sed continuò, & successiuè. Intensio in gradus perfectionis ad imperfectiorem additione in specie qualitatis, & parte subiecti, eadem consistit: gradus porrò individuali, partialiq; differentiâ, perfectiorem entitatem connotante, à se inuicem distinguuntur. Qualitates corporeæ, secundum se consideratæ, itemq; spirituales naturales, paritatem versus, terminum habent nullum; earum magnitudo intensiua, gradu octauo naturaliter absoluitur: millesimum gradum, eoq; amplius addere potest vis superna, quæ supernaturalium qualitatum accretionè, certis velut cancellis haud circumseripit.

XXXV.

In motu Physico propriè dicto, mouens, à Mobili realiter seiungitur; proprietatum à substantiâ dimanatio, calidæ aquæ ad natium frigus regressio, iure tribuitur generanti. Agens increatum, sicubi præsens non est seipso, non agit: Creatum non contingit passa distantia, quin contingat intermedia: idcirco Sol in locis terræ intimis, per virtutem toto in medio diffusam, metalla progenerat, fascino malignam qualitatem ex oculis, & vultu eiaculantur; attractiua virtus vmbre, paleas, Adamantis, & Magnetis ferrum trahit, vtraq; in medio propagata: Echeneis nauigio mordicus affigitur, deinde retinet illud robustissimè, naturâ vires abditas exerente, & lacertosos remigum toros deridente: Torpedo piscis, aurâ quadam sui corporis, & hamum affiat, & piscatoris dexteram; non ille tamen, sed hæc stupefcit. Instrumenta à Deo sublimata in distans operari, argumento est ignis tartareus, Dæmonas in aère commorantes, vrens.

XXXVI.

Simile in specie, non in gradu, agit in simile; & simile in vtroq; non agit. Reflexam qualitatem corpus illud intendit, à quo fit reflexio: sic, lamellas Procli radius Solaris aduerberans, è regione comitas naues
incen dit

incendit. Antiperistasis contrariam qualitatem à passo vel extrahit, vel repellit; quandoque concentrat natiuam eius virtutem, quandoque magis intensam reddit. Ita brumali tempore, humanus stomachus calidior est; aqua in puteis æstate frigidior. Agentia repati & agere, pati & reagere passa, secundum eandem etiam contrarietatem, docet vsus, niue manum infrigidante, & manu niuem resolvente.

XXXVII.

Elementa sunt corpora simplicia, generabilia, sublunaris materie, Equateraa sublunarium principia. In his locum priorem ignis obtinet summè calidus, moderatè siccus: Sphæra eius, lunæ cauo contigua. nam hinc etiam vbi.

In tonuere poli, crebris micat ignibus ether.

Terræ gremium, igni præternaturale est; nullam proinde quietis in eo partem capit: hinc

Horrificis iuxta tonat Aetna ruinis,

Interdumq; atram prorumpit ad ethera nubem,

Attollitq; globos flammaram, & sidera lambit.

In ærarijs Cypri fornaculis, vbi Chalcites concrematur, pyraustæ oriuntur, & ibidem degunt; Salamandra vires ignis diutissimè sustinet: Linum Cyprum purgatur ab igne, non exurit; ardor Asbesti lapidis restingui nequit: fors hæc ignium differentijs à materie petitis, & prægelido animalium temperamento adscribenda. Flammæ inferorum, nullo passu egent, aboleri nequeunt, vsulant animas, corporaq; at non absument: Diuinum id miraculum est. Ignescunt corpora per collisionem, & motum, si interceptus aër rareseat, & incendatur prius: id experientia probat,

Namque volans liquidis in nubibus arsu arundo.

XXXVIII.

Aer humidus in summo, propè summum calidus, triplici regione distinctus. Supremâ, quæ calidissima ob ignis spherici contiguitatem; Mediâ, quæ propè algida ob terreas exhalationes; Imâ, quæ temperatior ob reflexos radios Solis. Chamæleon & Monocodiata, non aère puro, sed vaporibus admixto nutriuntur. Maximum frigus, & remissus humor, aquæ debita sunt; præterea nulla qualitas secunda, si in statu naturali

naturali aqua perseueret : Salsedo maris, ex terrei sicci cum humido permistione, prouenit. Fluiorum quidam & Fontium è mari, quidam ex àère addensato, & guttatim destillante, ortum habent; varia virtute pollent, & vario discrimine. In Bœotia fluentum est duplex; horum alterum memoriam excacuit, obliuionem adfert alterum, quod Lethen vocant: vt non immeritò Virgil:

--- Lethæi ad fluminis vndam
Securos latices, & longa obliuia potant.

XXXIX.

Terra, loco, & dignitate, vltimum est elementum, frigida in præcellenti, maximè sicca; hæret immota in vniuersi medio, cuius centrum Physicum, non Mathematicum est: vnum cum aqua globum physicè constituit; plerisq; montibus à Deo in prima mundi creatione distincta, nunc in dies quosdam alios natura egerit, quosdam æquat solò. Terræ locus omnis incolitur, siue is prematur æterno gelu, siue ibi sit, vbi

----- Cælifer Atlas
Axem humero torquet, stellis ardentibus aptum.

Mira sub ipso penè Æquatore vbertas Regionum, mira cœli clementia. Antipodum oras, in Regna, & Eparchias distributas, incolunt permulti; iamque inibi Christiana fides longè latèq; propagari cœpta; vt eas dari nemo ambigat.

XL.

Calor, Frigus, Humiditas, & Siccitas, actiuæ sunt qualitates, & passiuæ; inæquabiliter tamen: priores siquidem magis agunt, quam resistunt; posteriores contra. Calor ignis ab àéreo, imò cœlesti etiam, & vitali differt numero, non specie; par de Siccitate Ignea, Terreaque; Humore Aqueo, & Aéreo; Terrestri Algore, & Aqueo iudicium. Grauitas Terræ, summa est, & tam ab aquæ grauitate, quam ab Ignis Aërisq; leuitate, essentialiter diuersa. Ignea leuitas eminentissima, & simul ab aëris leuitate, terræ, & aquæ grauitate, per speciem separata. Grauiua leuibus eminentiora descensionem, leuia subdita grauibus, sursum ferri expetunt: grauiua deinde & leuia sub finem, proiecta initio, in medio progredientia velocius promouentur.

DE ME-

DE METEORIS.

XLI.

Meteoron, imperfectum mistum est, ab ijs, è quibus miscetur, elementis specie non differens: eius materia remota, terra, & aqua; proxima, vapor, & exhalatio: Efficiens mediatum, astra, immediatius calor, motus, antiperistasis: Locus, àëtrinè diuisus, terra, & aqua: Finis, elementorum puritas, & vniuersi ornamentum. Permissu numinis, efficere Meteora Dæmon potest, posteaquam naturalia passiuus, actiua commiserit. Impressionum ignitarum tot sunt discrimina, quot figuræ; ex hisce insigniora sunt, quæ

Transcurrunt, crinemq; volantia sydera ducunt.

Auram pestilentem, Magnatum obitus, bella, horrida bella, prænunciât,

Si quando nocte Comete

Sanguinei lugubre rubent.

Tonitruum nubem concutiens ac elidens, fulgur leuiter accensus, fulmen probè igniens, terramq; petens, halitus est: cum fulmine decidit quandoque prædurus lapis, ex terræ halantis materie, intra nubes cõagmentatus.

XLII.

Impressio ventosa prouenit ab exhalatione arida, copiosa, per àërem obliquè fortiter & longè mota. Ventorum alij Orientales & Occidentales, Meridionales & Septentrionales alij: eorundem varia temperies, nomina, & effecta:

Soluitur acris hyems grata vice veris & Fauoni.

Eadem

Aquilonibus asperat vndas.

*Nauigijs violentior incidit Eurus,
creberque procellis*

Affricus.

Calidi & humidi Australes, calidi & sicci Orientales, Occidentales humidi, frigidi Aquilonares plerumque: persæpe verò peregrinis qualitatibus, etiam locorum quibus aspirant, imbuuntur. Turbulentiores venti tres extant: procella, turbo, præster: prior est exhalatio multa, confertim intra nubem conclusa, cum fragore deorsum labens: posterior vortex, qui à mutuo ventorum concurrentium impulsu gyrat: postremus est

C

mus est ignescens, & incendens obuia quæquæ, exhalatio. Luna si

*Virgineum suffaderit ore ruborem,
Ventus erit.*

*Sepe etiam stellis vento impendente videbis
Præcipites cælo labi, noctisque per umbram
Flammæ longos à tergo albescere tractus,
Sepe leuem paleam, aut frondes voltare caducas.
Aut summa nantes in aqua colludere plumas.*

XLIII.

Pluuia, est aqueum Meteorum, ab aqueosa nube in stillas resoluta pro-
ueniens, quæ si densius, & minutatim desluat, imber dicitur; nim-
bus, si densa cadat, & cum grandioribus guttis. Prænotant imminen-
tem pluuiam pleraque indicia, & ex his quædam Mathematica: Sol

*Vbi nascentem maculis variauerit ortum
Conditus in nubem, mediog. refugerit orbe,
Suspecti tibi sint imbres.*

*Luna, reuertentes cum primùm colligit ignes,
Si nigram obscuro comprænderis aère cornu,
Maximus agricolis, pelagog. parabitur imber.*

Idem accidit, quoties

Stellæ acies obtusa videtur.

Quædam vulgata, & agri colonis vsitatiõra, quibus

nunquam imprudentibus imber

Obfuit, aut illum surgentem vallibus imis

Aërie fugere grues; aut bacula, cælum

Suspiciens, patulis captauit naribus auras;

Aut arguta lacus circumuoluit aut hirundo.

Sanguinem, ferratas massas, ranas, pisces, carnes, si quando pluua se-
cum attulit, interdum à causis naturalibus, crebrius à Diuinis prodigijs
fuisse id profectum censeamus.

XLIV.

Pluuia in aère congelata, non pluua, sed grando est: eadem ex-
halationi terræ in glaciem vergenti commissa, lata, sparsimque de-
cidens niuem, rotundior & obducta cortice glaciali, granedulam facit.
Rorem,

Rorem, vapor à terra paululum eleuatus, si frigus noctis adsit temperatum; pruinam, si acrius, gignit. Florentes herbae, succum vaporis tenuissimi ab aëre liquati, prædulcem excipiunt, quem apes

estate noua per florea rura

vbi collegere, marurant; dein

liquentia mella

stipant, & dulci distendunt nectare cellas.

Subtiles terrei halitus partes à Sole decoctæ, aliquantum humidæ, insperatæ herbis granorum more, Syriaco idiomate dici consueuerunt, Manna, in Calabria non infrequens, & Medicis vsibus peropportunum: hoc ab Hebræo Manna non species, sed saporifero accidente, quod Angeli naturalia passiuus, actiua commiscentes, indiderant, vincebatur. Manna Polonicum, rorulentus, & in graminum cacumine residens; Saccharum, à ere us ab arundinibus Arabicis potissimum, Indicis, & Canarinis receptus, vel elicitus ex iisdem, succus est,

XLV.

Arcus, mille trahens varios aduerso Sole colores, Iris est, ex Phœbei minus magisque viuida luminis reuerberatione puniceum, virentem, & purpureum colorem exhibens: naturale signum diluuij particularis nusquam, vel tardè futuri; diluuij vniuersalis abfuturi, signum morale est. Area seu Halon, est vapor ab astro irradiatus, idemque velut coronans. Voraginem vapor copiosus, hiatum perexiguus, profundè à syderibus oppositis illustratus, refert. Virgæ apparent, quoties aut Sol promiscuè raram, densamque, rosicidam tamen illuminat, aut Solares radij multitudine peruadunt nubem. Cùm nubes humida, æque densa, obiecta Soli, aut Lunæ, vnam, pluresuè eorundem figuras representat. Parslion est.

DE ANIMA.

XLVI.

Mistio perfecta, est miscibilium alteratorum vnio. Elementa, quæ sola, ea que non semper omnia, in mistionem veniunt, non actu, sed virtualiter in mixto, peracta mistione, relinquuntur; ex quibus oritur naturale temperamentum, quod in qualitatibus motiuis tantum, vel alteratiuis æquale ad pondus dari potest, in

test, in vtrisque simul non item. Animata mixta cæteris nobiliora. Quid autem ipsa sit anima, aut vbi, aut vnde, magna est dissensio: Empedocles animam cordi, suffusum sanguinem; Zeno Stoicus, ignem; Zenocrates, numerum Pythagoreo simillimum esse censuit. Aristoteles longè omnibus præstans, proximius veritatem intuitus, pronunciauit animam esse actum corporis organici, potentiã vitam habentis, & esse principium quo primò viuimus, sentimus, mouemur, & intelligimus.

XLVII.

Species animarum ternæ censentur: Vegetatiua, Sensitiua, & Rationalis; prima plantis, sequens animantibus, extrema hominibus debita; quæ tamen in vno cõposito re distingui nequeunt. Herilus ergo Rex

*Nascenti cui tres animas Feronia mater
(Horrendum dictu) dederat, terna arma mouenda,
Ter letho sternendus erat.*

habuit vnã re animam, ter geminã formalitate. Vegetatricem sensitiua, vtramque Rationalis formaliter simul, & eminenter comprehendit: illæ corporeæ vt quod sunt, & materiam diuisibiliter animant, hæc Spiritualis, & tota totum, tota singulas Compositi partes informat. Nulla anima pluribus indita Compositis simul, aut successiuè: Palingenesiam Platoniam, & Pythagoræ Metempsychosin, vt erroneas, auersatur Philosophia. Nulla etiam anima præexistit ante compositi productionem: stellæ compares, quibus insisterent animæ corporibus nondum copulatæ, Platonis delirium erant.

XLVIII.

BRutos viuentium sætus, sola anima Sensitiua informat; Rationales, sola Rationalis; vtraque seminis formæ succedens immediatè. Ossa, cerebrum, medulla spinalis, cutis, caro, venæ, nerui, arteriæ, cor, hepar, & cæteri artus, quotquot vitæ functionibus destinantur, animati sunt: pili, vngues, cornua, plumæ, phlegmata, sanguis, cholera, melancholia, cuticula, medulla ossium, lac, adeps, semen, inanimata; formas tamen animã inferiores obtinent. Animatæ corporis partes ab anima heterogeneitatem, non à formis (quas vocant) partialibus habent: eadem miris ligaminibus continuantur. Inanimatarum partium quædam pererrant corpus, quædam adhærent, quædam excernuntur.

Problemata.

Problemata.

AN Indiuidua eiusdem speciei, sint æqualis inter se perfectionis substantialis partialis, vel in eadem à se inuicem differant?

AN partes viuientis Heterogenæ specie incompleta partiali, vel differentia Indiuiduali partiali, inter se distinguantur?

XLIX.

Potentia realiter ab anima distincta, suis organis circumscribuntur; Sensitiua soli Materiæ, Spirituales animæ rationali insunt: Speciem ab actu & formalibus obiectis sumunt; ab anima dependent vsq; adeò, vt ipsius Dei nutibus, ab ea secerni quidem, at non operari extra illam queant, eiusdemque influxu immediatè vtiliter operantur. Vegetatrix anima, tres continet potentias, formaliter distinctas: nutritiuam, augmentatiuam, generatiuam; quibus attrahens, decoquens, retinens, expellens, deseruiunt. Obiectum eius remotum, omne mistum est; proximum, solus sanguis in hepate generatus, in venas ab eodem dispersitus.

L.

Viuens, continenter alicur, quoad omnes, tam æquales, quàm proportionales; tam spermaticas, quàm nutrimentales partes. Cibi expers & potiois, non superuiuit animal vegetum, aut diuturnum. Commentitia de Romano viro, annis quater denis sine cibo superante, Rondelecius refert. In vsu ciborum, afluendo maius, omnium opinione, momentum habet:

*Profecit poto Mythridates sepè veneno
Toxicane possent seua nocere sibi.*

In delectu permagni refert, penitus internoscere, quid alimenti vniuscuiusque requirat complexio. Malesuada fames est; concerpit enim stomachum cibi appetentem, & vicina stomacho membra; Sitis linguam excoquit, & fauces: illa calidi & sicci, hæc frigidi, & humidi appetitus est: sedatur vtraq; nutrimento, quod omnes aliti partes adauget, omnes diminuit opera natiui caloris: solidiores attamen, ossa exempli gratia, manent eadem numero, auctæ insigniter, non prius absumptæ, in extremo etiam vitæ. Augmentatio viuientis, ad annos consistentiæ, quos 25. ætatis annus adfert plerumque, durat: Nutritionis tempus totum vitæ æuum complectitur.

C 3

LI.

L I.

Facultas vitalis, est eadem nutriens potentia, in corde collocata, & spirituum vitalium generationi addicta; Systolen cordis & Diastolen, quas gemina quies interpolat, efficiens, vt humidus cordis vapor extra propellatur, & calor eius, appulsu noui àeris, contemperetur. Arteriæ, quas cordis motus commouet, non dilatantur, quia implentur; sed vt impleantur, latiores pandunt sinus. Animalis facultas à potentia nutriente, quatenus illa cerebro ingenita est, & spiritus animales motum, tentationemq; exercentes, procreat, non distinguitur, Thoracis motus, causat respirationem; i thoracem vero pulmones, propter motum vacui partialis, promptè sequuntur.

L II.

Nutritio non fit in instanti, sed successiuè; non ita vt nunquam interrumpatur, sed quando fit, successiua est. Augmentatio est verus motus, cum vera successione coniunctus, in quo tamen quantitas producitur nulla, sed præexistens alimenti moles, cum mole corporis aliti, connectitur quantitatè indiuisibilibus, quæ sola tunc recens ex eius potentia educuntur. Rarefactio, quam natura sociauit augmentationi, est motus ad qualitatè raritatis, ita corpus afficientem, vt eius ope maiorem magnitudinem habeat, minorem, absente illa; maneat vero semper eadem quantitas, & materia. Cespitarunt veterum plerique, rarefactionem aut in pororum vacuitate, aut in corpusculorum interiectione, consistere arbitrati.

L III.

Generatio viuentium, est origo seu processio viuentis à viuente, vt à principio coniuncto, in similitudinem naturæ. Natus quo magis generanti similis, eò perfectiorem generationem nactus esse censetur: vniuocam similitudinem, æquiuoca perfectiorem arbitrare; quocirca proles in aquilarum genere, cum Haliaethum aquila, phœnas Haliaethus progenerat, perfectæ generationis rationem non habet. Organa generationis, non sunt omnia membra corporis, sed vasa duntaxat spermatica, quorum est apparare, decoquere, & conseruare genitale semè; cuius materia duplex est, altera sanguis sola quantitate superfluens, ex
 venis

venis tractus, altera spiritus vitales ex arteriis, in loca spermatica derivati. Vterq; sexus, semen conficit, & concurrit tam actiue, quàm passiuè, ad fœtus generationem; in qua principalia membra, cor videlicet, cerebrum, iecur, ossa, nerui, simul ex spermate efformantur.

LIV.

Sexuum differentia, non specifica, sed accidentalis est; inuiolabili tamen naturæ sanctione roborata, vt maris in fœmellam, vel huius in marem Metamorphosis, figmento conformior sit, quàm veritati. Exteriora parentum, lineamenta in prole visuntur, propter vim formatricem semini insitam, quandoque ob concipientis imaginationem. Monstrorum, quæ in fœtibus viuentium frequentiora, causa ad imaginationem, seminis copiam vel exiguitatem, & diuersorum specie seminum confusionem, referenda.

LV.

Potentia sensitiva, ad præstandas operationes eget concursu specierum sensibilium in genere causæ Efficientis; neque per solam receptionem huiuscemodi specierum, sed actiue exercet sensationes suas. Habent species sensibiles tam extensiuam quàm intensiuam, & in representando diuisibilitatem: neque sunt quædam peregrinæ substantiæ, aut subtilia corpuscula; sed accidentia realia, è potentia medijs, organi, & sensitivæ potentiæ producta, obiecto ignobiliore eius, tamen vice sensationem adiuuantia. A sola specie obiectum absens representari, & specie non representante, probè sentiri, si Deus volet, potest. Ita Diuino Abbati Benedicto, Solaris radius, species vniuersum representantes, exhibuit.

LVI.

ENS incorporum, aut materiales substantiæ, nequeunt sentiri per se, accidentia sola mouent sensum. Nullus præterea sensus propria sensationem, aut eiusdem carentiam, positiuo actu sentit. Sunt sensibilia, alia communia, vt motus, quies, figura, numerus, magnitudo; alia propria: illa complures sensus, hæc vnum peculiarem terminant. Species proprijs sensibilis, speciei commune sensibile exhibenti, coniungatur, & ab ea modificetur, necessum est. Induisibile quoad locum, nequit

nequit à sensu percipi: quare Christi corpus in Eucharistia, per Diuinam etiam potentiam, terni impossibile est.

LVII.

ERror sensuum exteriorum nusquam est, si obiectum moderatè distans, medium benè dispositum, & organum minimè impeditum sit: positis tamen cæteris paribus, frequentius circa sensibile commune, & multò crebrius circa sensibile per accidens, quàm circa proprium error sensuum contingit. Sensus non ab obiecti vehementia tantùm, sed alijs ex causis ab obiecto læditur: vel neruorum, qui sensus ministri sunt, obstructione, vel humoris debiti exarescentia, aut indebiti influxu; vel si diu multumquè sensatio protrahatur; & ex alijs originibus.

LVIII.

EXternos sensus, vt natura, & munere, ita loco visua potentia superat: eius organum oculus est, quem suæ inuestiunt & adornant tunicæ: Integrat humor albugineus, vitreus, & crySTALLINUS, quorum postremus opticam retinet potentiam. Color, primum visus obiectum est, à lumine, si verus sit, omninò diuersus. Ex reflexo lumine color apparet, verus ex primarum qualitatum contemperatione oritur.

LIX.

Lumen, est alterum visus obiectum, & simul conditio, quam ad videndum oculus exposcit; qualitas realis, primis facilè superior qualitibus, illustrat medium, & obiectum, vt vulgi error sit, Lynceus trans parietem sita, contueri posse, existimantis: neque Argonauta

*trans Pontum quoque
Submota Lynceus lumine immisso videt.*

Reiectandi pariter aquileges, quoties subterfluentis aquæ meatus humi reconditos se perspicere iactitant. Speciem sui transmittit lumen, neq; Diaphanum tantùm penetrando lustrat corpus, sed opaca etiam; non superficie tantùm, sed partium profundiorum tenuis illuminat. Extra missio visualium radiorum, olim Platoni, & Stoicis probata: illam nunc Schola Peripatetica ridet.

LX.

LX.

Organum immediatum auditus, est aer congenitus, immobiliter auribus inclusus; Obiectum, est sonus, à motu locali sonatiui qualitas realiter distincta, quam efficiunt tria corpora, actu, vel potentia discontinua; tam in produci, quàm in conseruari dependet à motu locali, aliquam tamen permanentiam in suo esse sortitur; in aère, & aqua, tanquam in subiectis recipitur, à sonatiuis principaliter causatur; in medio sonus à sono non propagatur, sed species tantum multiplicat intentionales. Echo fit per reflexionem specierum soni ad auditum, à locis concauis. Organum olfactus, sunt processus mamillares; obiectum odores, qualitates secundæ, quarum materia potissima est, siccum, aqueo humido commistum; ijdem per aërem & aquam mediantem, ad organum deferuntur.

LXI.

Gustus inest neruis linguæ, & palati simul; Obiectum eius saporibus, causati ab humido aqueo, cui tenue siccum adiungitur: dulcis sapor, & amarus, extremi sunt. Tactus organum, sunt nerui, caro, & cutis; hic à gustu realiter distinguitur; neuter verò, medium internum, per se requirit, per accidens habet vterque. Per species intentionales, tam Gustus, quam Tactus, immutat potentiam, quamuis ad Tactum, simul requiratur esse reale, & realis obiecti tangibilis contactus. Omnis porro qualitas tangibilis, siue sit actiua, vt sunt quatuor primæ qualitates; siue non, vt sunt asperum, & lene, durum, & molle, producit sui speciem in tactu, secundum excessum intensiõis, qua superant organum.

LXII.

Sedes interni, sensus, cerebrum est; officia sanè permulta, atque ea sola illum re non distinctum, in varias functiones disperunt. Hic enim quatenus obiecta sensuum externorum percipit, sensus communis nuncupatur; quatenus absentia recognoscit, facultas imaginatrix; quatenus obiectum conueniens aut disconueniens esse diiudicat, Cogitativa, & æstimatoria; Memoria denique sensitua, in quantum asseruat rerum cognitarum species, appellatur. Propriū verò actum, & substantiā, secundum se haud agnoscit, neq; iudicio vero, aut ratiocinatione pollet.

D

LXIII.

LXIII.

Potentia inorganica, noster intellectus est, intelligens id omne, quicquid rationem veri Entis vsquam habet. Geminus est realiter. Agens alter, qui species intelligibiles singularium, & materialium reru, non vero abstractarum ab hæcitate, vel materiæ concretionem, per se, & directè producit, Phantasmatis adminiculo: Alter Possibilis, qui circa species diuersantem intellectionem facit, quam terminat nobilis illa qualitas, verbum mentis: cum eodem est realiter eadem memoria intellectiua. Appetitum sensitium in corde locauit natura: rationalis liberrimas exercet appetitiones; vtrique prauia rei appetendæ cognitio adest, vtrique ignoti nulla cupido. Motiua potentia, vtrique subditur appetitui, eam tamen distinctam voluit ab vtroque natura.

EX PHILOSOPHIA RATIONALI.

LXIV.

Logica naturam solius praxeos habet; operationes, intellectus, vt dirigibiles spectat; earum proinde habitus directiuus esse definitur. Simplicem intellectus apprehensionem, per definitionis normam; iudicium compositiuum, diuisionis præceptionibus; discursum, modis argumentationum instruit. Vera idcirco Philosophiæ pars, veraq; scientia formaliter, & instrumentum Scientiarum causaliter est.

LXV.

Ens rationis, non est extrinseca denominatio, sed esse obiectiuum. ab intellectu conceptum, sub modo essendi penitus impossibili. Cognitio Sensitiua, nunquam Ens rationis facit, sed intellectus solus; neq; Deus immèdiatè fingit rationis Entia, sed ab humana ratione conficta, intuetur, ac ita illa velut mediatè facit. Negationes, Priuationes, & Relationes rationis, per modum Entium conceptæ, veluti genera Entium rationis sunt.

LXVI.

Ideæ Platonis citra singularia permanentes, sub Lunæ concavo vti non sunt; ita nec vniuersalium rationem participant: est verò Vniuersale, realis

realis natura, concepta sine omni singularitate; quæ si accipiatur reduplicatiuè, formaliter naturam realem, materialiter Ens rationis; sumpta specificatiuè, formaliter Ens rationis, realem naturam materialiter dicit. Per comparatiuam, non abstractiuam, perque Possibilis non Agentis intellectus operationem fit Vniuersale; & in Genus, Speciem, Differentiâ, Proprium, Accidens, ad æquatè diuiditur.

LXVII.

DEnarius Prædicamentorum numerus receptissimus est, Substantiâ, Quantitatè, Relationem, Qualitatè, Actionem, Passionem, Vbi, Sicut, Quando, Habere, comprehendens. Quantitas à Substantia realiter, Qualitatum quædam realiter, quædam modaliter, Actio, Passio, Vbi, Sicut, ex natura rei; Quando, à re durante, & Relatio à fundamento per rationem ratiocinatam separatur; Habere verò, extrinsecam tantum, addit denominationem.

LXVIII.

Secunda mentis operatio, est assensus mentis, quo rei apprehensæ cõuenire, vel non conuenire aliquid iudicamus: Enunciationes contradictoriæ, in secunda operatione de futuro contingenti, in materia singulari ita comparatæ sunt; vt altera illarum determinatè vera sit, altera determinatè falsa. Tertia operatio, in iudicio ex pluribus notis ignotum quiddam per notam illationis (ergò) inferente, consistit: ad hanc referenda est Demonstratio, quæ vt ex præmissis veris, necessarijs, causisq; conclusionis constituitur, ita facit scientiam habitualem, actualemq; in suo genere perfectam, quæ non per Platonis reminiscencias, quas *εὐρίας* ille vocitabat, sed per intellectus exercitationem comparatur.

EX PHILOSOPHIA

MORALI.

LXIX.

In quolibet genere actionum humanarum, aliquis finis vltimus statuitur. Felicitas naturæ rationalis, seu finis eiusdem, non consistit in opibus, potentia, honore, aut gloria, neque in bonis corporis, & voluptatis; sed in sola animæ, secundum rationem, operatione.

Et quidem si de naturali beatitudine dicendum sit, felicitas alia est Practica, quæ vitæ actiua finis est, & in operatione secundum virtutum moralium, potissimum prudentiæ, dictamen radicatur: Alia contemplatiua, quæ posita est in Dei, & aliarum Substantiarum à materia segregatarum, contemplatione: vnde non immeritò felicitas iuxta Aristotelem, est operationum animæ per rationem, aut non sine ratione, secundum virtutem in vita, perfectio.

LXX.

Virtus, est habitus electivus in mediocritate consistens, ea quæ ad nos est, definita ratione, & vt definitur ipse prudens. Omnis virtus Moralis (Prudentiam tamen excipimus) consistit in medio, quoad obiectum. Voluntas, quoad exercitium, mouet intellectum, & cæteras potentias, quæ suapte natura, quoad actus humanos, eius imperio subduntur; intellectus verò, quoad speciem actus, mouet voluntatem; appetitus sensitivus, non nisi imperio Polytico à rationali mouetur.



Defendentur publicè in Collegio Pol-
touiensi Societatis Iesv, Anno Domini,
M. DC. XXI. Mense Iunio,
Die Hora

PROS.

PROSPHONEMA,

quod

ERVEDITO D. SIMONI
REYKOWICZ, MODERATORI
SVO VIGILANTISSIMO, THESES
ex Vniuersa Philosophia propugnanti,
exhibebat

Illustris & Generosus Dominus

HIERONYMVS STANISLAVS
RADZIEIOWSKI,
Palanitides Rauensis.

ODE TRICOLOS.

Mars sua bella gerit, gerit & sua bella Minerua.

Nusitatos belliger occine
Mauors triumphos : ausa nouas sequi
Bellona pugnas, & recuruo
Aere viros resides ciere.

Non praeliantes horridus asperat
Furor, cruentus bucco ; nec insonant
Ira tenaces ; nec vibratus
Immocuum latus haurit ensis.

C 3

Non

Non torquet imos, remigio manus
Adnixa, fluctus; nec rapidas fauens
Portunus urget, nec retentat

Nereis, aut Panopaa proras,
Non ulla crudis praelia castibus
Miscet iuuentus; nec pugil arduus
Nudat lacertos, nec superbit

Lauriger, aut olea reuinctus.
Tandem refugit Martia bellicum
Frendens Enyo; te quoque deserit
Germana Fratrem; celsiorem

Diua Deam penitus secuta,
At non pudendam, quae sinuosior
Urit medullas, quae gerit intima
Armis amorum bella, paret

Cui, sua progenies, Cupido,
Sed nec Dianam, cui dedit inclytam
Latona stirpem; sternit & hac feras
Cornu supinato; nec illam

Quae fouet Argolicas Phalanges,
Colit supremam Pallada, Pallada;
Quae sola, fusi nescia sanguinis,
Ductat duellantes camenas,
Nescia terrifici tumultus.

Vides, ut omnes, Armipotens, vias
Decurrat acris; puluere Gymnico
Ornetur, ut vincat, caterua

Palladiæ generosa pubes,

Telluris

Telluris alma, Tebyos, Aetheris,
Sedem reuifit Miles; & auspice
Falix Minerva, uidit orbem
Ingenio volucer sagaci.
Squalet catenis error aheneis
Post terga vinctus; colla iugo simul
Infcitiarum vis dat omnis,
Procerit en pede victor hostes.
Ignaue Mauors, Palladi subdere,
Noftro Minerual nomine militi
Præbe reportanti trophæa;
Palladis arma, virumq; lauda.

EPIGRAMMA I.

Obtinet æternas Diuina Scientia laudes.

VT nulla tardi pectoris viget fama;
Sic perpolita plurimus vigor mentis
Adeft, honor quæ plurimus manet Cedro
Perennior, nec inuidum timet fatum.
Cur? nempe gloria sic Scientia durat,
Interminato durat, vt sciens æuo.

EPIGRAMMA II.

Splendidus Virtus, Ars cui vincta, nitet.

AVrato Paruis lapis metallo
Fulget gratius; annulos Pyropus
Chlenam Chryfolitus, Smaragdus oſtrum,

Limboſ

*Limbo purpureo lassis ornat ;
Virtutem magis Ars, magisq̄ virtus
Artem. Cur ita? scilicet lapilli
Soli decor est: nec ut lapilli
Expers purpura, chlena, limbus, aurum ;
Sic expers precij. sed artis expers
Virtus, (sit licet usque magna) parte
Splendoribus caret ; Arsq̄ si decore
Virtutis careat, caret valore.*

EPIGRAMMA III.

Seruat honoratos Sapia parta scientes.

*IN Stagyritaa certas, Bellator, arena:
At que belligerum premia Gymnas habet?
Est talis Sophia, luctis & honore, Palastra ;
Qualis Olympiacis lusbis Elis erat:
Non tamen Elea victor decorabere fronde,
Maiori dignus maior honore labor.
Se tibi per luctam quasita scientia dedit ;
Quam defensa probat, grata rependet opem.*

*Ad maiorem Dei Opt: Max:
gloriam.*

VIII IACELL

CRACOVENSIS



